

# EDITORIAL

VOL.62 ISSUE 139 RNI REGD. 8713/63 U NONGSAIÑ HIMA Tarik 25. 05. 2019

## Shem jingeh ka Sorkar namar kiba sah beain

**K**a la jan dap artat shi snem pura naduh ba la mih ka jingiakyndad kaba jur ha Shillong bad ka jing-dawa ban pynkynriah noh ia ki khar metor (Harijan) na them Iew Mawlong sha kawei pat ka jaka kaba kham kylluid, hynrei kumba ka paw mynta, kane ka kam ka long kaba jwat eh haduh katta katta. Lah ruh ban pynkynmaw ba wat ha ki snem kiba kham mynshuwa, la ju mih teng ki jingdawa ban pynkynriah noh ia ki khar metor sha kawei pat ki jaka khnang ba yn dup lah ban pyn-donkam ia katei ka jaka sah jong ki ha them Iew Mawlong na ka bynta kiwei pat ki jingthmu kum ka jingdonkam ban pynkyllu-id ba shna ia ka jaka ieng kali (parking lot) kaba kham paka ban pynkylluid ia ka Iew Mawlong, hynrei namar kiba bun ki daw, ka Sorkar kam shym la lah satia ban leh eiei. Kumba la paw mynta ruh, kane kajuh ka jingthmu jong ka Sorkar kan nym poi shano shano ruh.

Kaba kham sheptieng ka long, halor ka jingkhapngiah (congestion) kaba ishyrkhie ha katei ka jaka namar ka jingbun briew kaba nang kiew katba nang mih ki sngi. Ka jingkhapngiah, ym don shuh ka jingkhuid jingsuba ha katei ka jaka bad kane kan ktah ia ka koit ka khiah jong ki briew kiba shong ba sah ha kane ka jaka.

Kum ban shu pynkynmaw, ka jingiakyndad ha Shillong namar ki khar metor ka la jia ha ka 31 tarik Jymmang 2018 bad ka la neh kumba shi taiew. Ha kane ka jingiakyndad kaba la wan rah ruh ia ka jingmysaw briew kaba jur kynthup ki briew jong ka ain, la mih ka jingdawa bad ka jingai jingmut na kiba bun ki liang ban pynkynriah noh ia ki khar metor na them Iew Mawlong sha kawei pat ka jaka. Ym lah ban len ba ka Sorkar ka la kular ban leh ia kaba donkam bad thung ruh ia ka High Level Committee (HLC) ia kaba la khlieh da u Deputy Chief Minister u Bah Prestone Tynsong ban bishar bniah ia kane ka kam. Kumba la ai jingmut da ka Sorkar, ka HLC ka la leh ia la ka jong ka bynta ha kaba iadei bad kane ka kam, hynrei la sngewthuh ba ka Sorkar ka shem jingeh haduh katta katta ban pynurlong ia la ka jong ka jingth-mu.

Katkum ba la lah ban sngewthuh, na ki 2500 ngut tam ki khar metor kiba sah ha them Iew Mawlong, kiba trei bad ka Shillong Municipal Board lem bad kiwei pat ki tnat treikam jong ka Sorkar jylla ki don tang kumba 200 ngut tam. Kumba 90 percent ki la shu sah beain ha katei ka jaka khlem da ioh jingbit na ki bor kiba dei peit. Ka jingbym lah ka Sorkar ba pynkynriah ia ki khar metor na katei ka jaka ka long na ka daw ba kito kiba shu sah beain kim don jaka satia ban phet shano shano ruh. Ki khar metor kiba trei bad ka Municipal lem bad kiwei pat ki tnat treikam ki kloï ban mih noh na them Iew Mawlong ban leit sah sha kawei pat ki jaka ba la dep pynkhreh da ka Sorkar, hynrei namar ka jingbym lah ban pynkynriah ia kiwei pat kiba shu sah beain, ka jingthmu ban pynkynriah noh ia ki shawei pat ka la pulom noh.

Ka long kaba shisha kumba ju mih ki jingkynthoh ba jingbym leh eiei ka Sorkar naduh ki snem kiba mynshuwa ka la buh jingeh mynta ka kynti. Ym lah ban sngewthuh, ha kano ka rukom ki khar metor ki ioh ban sah ha kum katei ka jaka kaba donkam haduh katta katta kaba long ruh ka jaka pdeng (centre) na ka bynta ka khai pateng.

**Ka Jylli Ki Khrav Pyrkhath**  
Ki riew madan kim ju duwai; ki nang tang ban pan/khron- G. B. Shaw

Printed, Published and Owned by Mrs. AR Lyngdoh Mawphlang and printed at U Nongsain Hima Offset Printing Press, Industrial Estate, Shillong and Published at Khasi National Durbar Hall (Ground Floor) Mavis Dunn Road, Mawkhrah, Shillong - 793001. Editor: Bah L. Thabab. Ph: 0364-2544773; 9863060455, 9863197788, 8794187135, 9862831987 Advertisement: Ph: 0364-2544773, 9862506932, 9863136797, Email : nongsain@yahoo.co.in

# KA AGROECOLOGY BAD KI NONGREP TRAI RI JONG KA MEGHALAYA

Deaidakami Mohrmen, Coriniki Slong bad Bhogtoram Mawroh

Kumba long kiwei pat ki Jylla, ka ioh ka kot ha ka Jylla Meghalaya ka shani-ah tylli tyllan ha ka kam rep. Ki kam tynrai ba ki briew ka Jylla ki trei bad im ja (kaba kynthup ia ka kam rep bad kaba tih ia ki mar poh khyndew) ki noh synniang haduh 30% na ka kamai ne ka ioh ka kot ne kata ka GDP jong ka Jylla, kaba mut, phra hajar shispah hynriew phew phra klur (Rs 8,168 crores) tyngka na ka ar phew hynniew ar spah ar phew phra klur (Rs 27,228 crores) tyngka ka jingkamai jong ka Jylla ka dei ba ki nongrep ki nohsynniang. Palat marshiteng na ki nongshong shngong ha ka Jylla ki dei ki nongrep, ka Jylla kan ym lah ban ioh ia ka roi ka par bad ka ioh ka kot kaba neh bad ba khlain lada ka leh bymsuidniew ia ki nongrep. Phewse ka bhah ba ki nongrep ki ioh na ka ioh ka kot ka Jylla ka long tang shi saphit. Ka kamai ba ki nongrep ha Ri India ki ioh shisnem shisnem ka long tang kumba lai phew hynniew hajar (Rs 37,000) tyngka kaba mut tang kumba lai hajar (Rs 3000) tyngka ki kamai shi bnai. Ki nongrep ha ka Jylla ruh ki kamai tang katne bad ngin sa iapeit ia kane ka phang hadien. Kane ka mut, ba watla ki nongrep ki noh synniang shibun bah sha ka ioh ka kot ka Jylla, pynban ki dei ka kynthun kaba shah iehnoh bein. Kiei kine ki nongrep kiba kyntiew ia ka Ri bad kiba long u budlum jong ka ioh ka kot ka Jylla? Kaei ka khana ba ki don ban iathuh? Kane ka jingthoh kan iathuh ia ka khana shaphang ki nongrep trai ri ha ka jylla kiba long ka nongmuna jong ka jingiakhih iaksar jong ki nongrep ha ka Jylla baroh kawei. Kine ki nongrep watla ki mad shibun ki jingeh, hynrei ki don ruh ka khana bad ki daw kiba don jingmut ba kumno ki lah ban im ban iaksaid ha ka jingim bad ban im ka jingim kaba kordor bad kaba seisoh.

Ka Kong Phron Kassar ka dei ka nongrep kaba 51 snem ka rta bad ka shong ka sah bad ka rep ka riang ha ka shnong Skhenpyrsit kaba hap hapoh ka Amlarem C&RD Block, West Jaintia Hills. Ka kmie jong ka ka dei ka Kong Shida Kassar (bam kwai ha dwar u Blei) kaba phet shngong na Umladkhar sha Skhenpyrsit ban wad kamai jakpoh. Ka Kong Kassar ka shong skul tang haduh klass III ha elpi skul ha Skhenpyrsit bad kam shym la iohlad ban bteng ia ka jingpule namar ka jingduk jingkyrduh pisa. Ynda haba ka la kynjoh 12 snem ka rta ka la iarap kam noh ia ka kmie ha lyngkha. Ym slem hadien, kumba long ka kmie jong ka, kaba ju khaii masi, ka ruh ka la ri shiphew tylli ki masi bad 13 snem mynshuwa ka la die ia kita ki masi ha ka dor sawphew san hajar (Rs 45,000) tyngka khnang ban kyrshan bai skul ia ki khun bad ka da kut jingmut triang ba ki khun jong ka ki dei ban ioh ia ka jingnang jingstad bad kim dei ban liat ha ka apot kaba ka la ngat.

Haduh mynta ka Kong Kassar ka rep bun jait ki mar rep bad ki jingthung, kum, u sying, pathaw, rynsun, rymbai, tyrsor, jhur motor, kba, muli, phan, phan karo, phul kubi, kubi, jhur salad, kajor, sohkhia bad kiwei kiwei de. Ha la ka jong ka kper ka Kong Kassar ka thung ia ki diengsoh kum u sohiong, salangi bad soh phareng. Ha ka juh ka por ruh ka ri ki jingri kum ki syiar, sniang bad ruh ki ngap. Katkum ka jing-thuh jong i ba ka kamai kaba i ioh shi snem shi snem na kane ka kam rep bad na ka kper jong i ka long kumne, na ki jhur i ioh kumba hapteng Rs 20,000 bad Rs 25,000, na ka kam ri sngiang kumba Rs 8000 haduh Rs 9000 bad hapteng Rs 4000 haduh Rs 5000 na ka kam ri syiar. Te haba khien lang tang ia ki jingioh kiba kham heh ka jingioh i Kong Kassar ha ka shisnem ka long Rs 39000 bad haba pynbynta ha ki khatar bnai ka jingioh ka long tang Rs 3500 kaba mut Rs 110 shisngi bad kane ka long thik kumba ioh ne kamai lem ki nongrep ha kylleng ka Ri India. Kaei kaba ngi donkam ban pule bad puson halor kane, ka long ba ka jingioh kamai ki nongrep kum i kong Kassar haka Jylla ka long kaba tang shi saphit bad kaba duna than eh haba ia nujor bad ka dor bai bylla sngi ki nongrep kiba la tbit ha ka kam kaba la buh da ka Sorkar Jylla kaba long Rs 420 shi sngi.

Ia mynta hi ban kyntiew ia ka kamai kajih bad jingioh i Kong Kassar i pyn-donkam da ki dawai kum ka DAP, khnang ban lah ban pynmih khambun ki mar rep ne ki jhur ki jhep ba i rep. Ha kawei ka sngi kata ka dawai pyniaph khniang ka la hoit ha ka kjat jong i bad ka snieh doh ka sdang ban dait buit bad kane ka la pynshep-tieng shikatdei eh ba kumno ki dawai ki lah ban ktah ia ki jhur, ki mar rep, ia ka khyndew bad ruh ia ka jingim briew. Kane ka jingia ka la pynkyndit bynriew ia i bad naduh kata ka por i la kut jingmut ban ym pynndonkam shuh kino kino ki dawai ha ka lyngkha bad kper jong i bad ba naduh kata ka por i la rai ban phai biang sha ka rep tynrai tang da ka sbob ba ka mei mariang ka ai. Ka jingsngewkhia bad jingsngew kitkhlieh jong i na ka bynta ka bha ka miat ka mariang bad ka jingim briew ka la wan hakmat eh ban ia ka jingiohngong bad jingmyntoi shimet. Mynta ryngkat bad kiwei de ki para nongrep na Jaintia Hills i iatreilang bad ka SURE ne ka Society for Urban and Rural Employment bad ruh bad ka NESFAS ne ka North East Society for Agrobiodiversity and Slow food bad ki pynndonkam da ki buit bad ki stad saian tynrai kiba ka mariang ka hikai na ka bynta ka rep ka riang.

Ha ka snem 2018 ka IPES ne ka International Panel of Experts on Sustainable Food Systems, ka la pynmih ia kawei ka jingthoh, "Breaking away from industrial food and farming systems" lane halor kumno ban iakhlad ne kynriah noh na ka rukom rep bad ka rukom pynmih bam da kaba pynndonkam da ki dawai bad ki kor ki bor tang ban lah ban pynmih kham bun bad kamai kham bun khlem da pyrkhath ia ka bha ka miat ne ka koit ka khiah ka mariang bad ka jingim briew. Ha kane ka jingthoh la kdew bad batai shai kdew shaphang kata ka Agroecology lane ka stad ka buit tynrai ba ka mariang ka hikai halor ka rep ka riang bad kane ka stad tynrai lane ka Agroecology ka kynthup bad ka jingthmu jong ka long ban wanrah ia ka rukom rep bad rukom pynmih bam kaba long pyrshah ia ka rukom pynmih mar rep mar bam jubor da ki dawai bad ki kor ki bor kiba ktah pat ia ka jingim bad ka mariang. Ka Agroecology ka dei ka buit bad stad saian kaba iadei bad ka kam rep bad ka jing-mut jong ka ka long kaba iar namar ka kynthup ia ki rukom rep bym ai dawai, nang-ta ka rukom rep kaba neh pateng la pateng, kaba lah ban pynim bad iai pynim thym-mai na ka pateng sha ka pateng, kaba ki nongrep hi ki kyrshan da lade ia lade ha ka kam rep, ka pynmih bam bad kumta ter ter. Ha ka jingjurip bad jingwad bniah kyll-leng satlak ka pyrthei la shem ba kane ka rukom rep da ka buit ka stad tynrai lane ka Agroecology ka long kaba myntoi shikatdei eh ha ka ioh ka kot ka kamai kajih ki nongrep, ka ai ruh ka jingshngain bad jingthikna ha ka ioh bam ioh dih bad kumta ka wanrah ia ka jingshngain bad ba bha ka miat ha ka imlang sahlang, kumjuh ruh ka long ka jingkyrkhuh bad jingmyntoi ia ka mariang namar ba ka khyndew kam kylla bih hynrei ka iai im bad iai thymmai bad ka ka mariang ruh ka neh ka sah pateng la pateng. Ha u laiong 2018 ka seng UN Food and Agriculture Organization (FAO) ruh ka la ban halor ka jingkongsan jong ka Agroecology ha ka jingialang kaba ar jong ka FAO International Symposium on Agroecology bad la iai ban ba kane ka rukom rep bad rukom pynmih bam ka long kaba kongsan ka ban ialam sha ka thong kaba la maitphang ha ka Sustainable Development Goals lane kata ka jingthmu ban ioh ia ka roi ka par kaba neh sha ki pateng bymjukut.

To ngin iaphai biang mynta sha ka khana shaphang i Kong Kassar ha kaba i la batai bad pynpaw ha ngi ba naduh ba i la sdang biang ia ka rukom rep tynrai i la pynndonkam ia kine ki sbob ba pher bapher ba ka mariang hi ka ai kum ka eit masi, ei sniang bad eit syiar. La ju tih ia ka thliw ha ka kper ban tep ia kita ki eit jong ki jingri jong i baroh bad hadien la tep sa u skum kba bad u dpei khnang ban nang pynsbob shuh shuh. Haiden ba ka la kylla sbob in sa tih biang ia kata ka thliw ban khat ia ka sbob bad in sa la leit ber bad tep ha ka lyngkha. Ha ki por kiba mynshuwa ka seng SURE ka ju iarap ia i Kong Kassar ban ioh jinghikai kumno ban pynkylla sbob na ki eit bad kiei kiei kiba don ha ka mariang hi.

Nalor nangta, ryngkat ka jingkut jingmut kaba skhem ban ym pynndonkam

dawai, i Kong Kassar i la thaw bad pynmih hi ki buit kumno ban pyniap ia ki

khniang kiba bam ia ki jingthung da kaba pynndonkam ia u chyrmit kyndeh. Ia u chyrmit kyndeh i dung lwet bad i khleh bad ka um bad hadien kata in sa synreit sha ki jhur kubi. Katkum ka jingiathuh jong i ka long ba ka por kaba biang eh ban syn-reit ka long ha shuwa ba ki sla kubi kin khylliap bad ha kane ka rukom i la lah ban iada ia u jhur na ka jingpynjot ki khniang. I Kong Kassar i iathuh ba ki jhur ki jhep hi kiba lait na ka dawai, ym tang ba ki long kiba bang bad shngiam hynrei ki pynkoit-pynkhiah bad pynkhlain ruh ia ka khyndew bad ba lyngkha rep.

I Kong Kassar i ioh ia ka buit bad jingstad ban pynndonkam ia u chyrmit kyndeh ban pyniap ia ki khniang da kaba khmih thuh kumno ba la ju pynndonkam ia une u chyrmit kyndeh ban sumar ia ka jingpang bnaiat kaba ki briew ha shngong ha thaw ki la ju pynndonkam baroh shi kata naduh ki por barim bawah. Ka long kaba shisha ba une u chyrmit kyndeh u don ka bor ban pyniap doh. I Kong Kassar i pynkut nia da kaba ong ba namar ba une u chyrmit kyndeh u don ka bor dawai pyniap doh ha u kumta u dei ruh ban don ka bor ban pyniap ia ka bor bad ba bih jong ki khniang kiba bam ia ki jhur bad jingthung. Ka long ruh kaba myntoi ban tip ba i kong Kassar i dei ruh i ba ai dawai kynbat bad i long ruh i briew iba tbit bha ban sumar pang da kaba khem bad i ju pynndonkam da ka umphniang tyrsor bad i long i nongsumar khem iba pawnam. I Kong Kassar i iathuh shuh shuh ba i la pyrshang ban pyn-donkam ia ka um chyrmit kyndeh ha kiwei ruh ki jhur ne ki jingthung khnang ban tip ia ka bor jong kane ka dawai pyniap khniang kaba i la thaw bad pynmih hi na ka mariang.

Ka jingkylla na ka rukom rep bad rukom pynmih marbam kaba shaniah tylli tyl-lan ha ki dawai bad ki kor ki bor sha ka rukom bad stad tynrai ba ka mariang ka ai bad hikai ne ka agroecology kaba kynthup naduh ka rukom ban iada ia ki jingthung bad mar rep na ka jingbam pathar ki khniang, ban iada ia jingthung na ki jingpang kiba lai phew jait kiba ju wan bad lynshop na ka por sha ka por, kaba i Kong Kassar mynta i pynndonkam ka long kawei na ki jingleh kaba la pynmih soh bad pynmyntoi shibun ia ki nongrep kaba la shem na ki hynriew tylli ki jingjurip bad jingwad bniah kiba la pynlong ha ki Ri USA, Nicaragua, Mexico, Tanzania, France, China, Spain bad Cuba. Ban poi sha kane kajuh ka thong bad ban wanrah ia ka jingkylla ha ka kam rep kaba long katkum ka stad agroecology ne ka rep tynrai, ka NESFAS bad ka SURE ki ai jinghikai ia ki nongrep ha kane ka phang. Ka jingthmu jong kane ka long ban pynkup bor bad pynsngewthuh ia ki briew bad ki nongshong shngong ban tip bad sngewthuh, ban pynim pat bad ban kyntiew ia ka rukom rep tynrai kaba la ju don naduh ki por barim bad ban kyntiew ia ka rukom rep tynrai ne ka agroecol-ogy khnang ban nanglah ban pynmih khambun ki mar rep bad mar bam bad ban pynneh pateng la pateng ia ka khyndew bad ka mariang. La sdang bad pynlong ruh ia ki hynriew jait ki jingwad bniah bad jingjurip kiba kyrpang halor kumno ban shem ia ki kynbat kiba lah ban pyniaph khniang bad sumar ne iada ia ki jhur ne ki mar rep na ki jingpang bad ruh kumno ban pynseisoh ia ka khyndew. Ha kane ka jurip la kynthup lang lai phew phra (38) ngut ki nongrep na ki kynthun Jaidbynriew Khasi bad Garo. Na kitei ki 38 ngut, 28 ki dei ki nongrep kynthei bad 10 ngut ki shynrang.

I Kong Kassar i iathuh ruh shaphang kaei kaei kaba sngewtynnad ba ha ka por ba jied nongmihkhmat u sying u iaied iew bha, kumta i la kut jingmut ban rep kham bun ha ki snem ki ban wan. Kaba kham sngewtynnad ka long ba u symbai sying u dei uba i la ioh pateng na i kmie rad jong i. I la kut jingmut ban bud pyrkhath ia ka rukom rep tynrai ba ka stad, mariang ka hikai, kata ka agroecology kaba hikai ym tang ba ki briew kin ioh bam shilynter ki saw aiom khlem sangeh hynrei kaba hikai ruh ban ngin synshar hi da lade ialade ia ka rukom pynmih ia ki mar rep ki mar bam bad ruh ia rukom ban bam ia ki jingbam kiba tei." Ka dei ka hok tynrai jong ki briew ban pynmih hi la ka bam tynrai ba ka mariang ka ai bad ban synshar hi da lade ialade halor ka rukom pynmih bad rukom bam kaba ka mariang hi ka ai kyrhai ha ki khun bynriew da kaba pynndonkam ia ki rukom rep bad ki stad ki buit kiba iadei bad kiba lah ban pynneh pynsah ia ka mariang bad ba ki briew hi kin batai ia la ka jong ka rukom im bad ia ka rukom pynmih mar rep mar bam"- La Via Campesina.

I Kong Kassar i die bad pyniaied iew ia ki mar rep mar bam ba i pynmih ha ka iew kaba don ha ka shnong Skhentalang. Hateng hateng ki briew ki ju wan ban thied ia ki mar rep mar bam beit beit na shnong jong i hi. Ha ki por kiba kham mynshuwa ki nongrep ha ka shnong Skhenpyrsit ki rep tang ban bam ia lade. Hynrei mynta ki la lah ban rep bad pynmih na ka bynta ban die ha iew ha hat ruh kumjuh. Ban kyrshan ia ka iing ka sem i Kong Kassar i bylla ruh kum ka nongshet jingbam (mid day meal cook) ia ki khynnah skul jong ka skul Dongwah SSA ha Skhenpyrsit naduh ka snem 2006. I dei iba nyngkong eh napdeng ki nongshong shngong ban ioh ia ka kam nongshet jingbam ha skul bad i ioh ka bai bylla kaba rit kaba tang Rs 150 shi sngi bad mynta pat i ioh ka jingsiew kaba Rs 1000 shibnai.

Ki nongrep kum i Kong Kassar ki noh synniang shibun sha ka ioh ka kot jong ka Jylla bad yn ym lah satia ban khein dewthala ia u synniang ba ki noh sha ka ioh ka kot. Lada ym lah ban kyntiew ia ki bad ia ki nongrep, ka ioh ka kot jong ka Jylla kan long kaba lah shilliang bad kaba shong synjor. Kumta ka rukom rep da ka stad ka buit tynrai, kata ka agroecology ka ai ha ngi ia, ka dur kaba shai ba ngi lah ban kynriah bad kdat noh biang sha ka tynrai ba ka mariang bad ki longshuwa naduh hyndai kulong kumah ki la hikai ia ngi kumno ban rep bad pynmih mar bam ha ka rukom kaba bha bad paka ha kaba ka mariang, ki jingthaw bad ki jingim kim sniew kum jot hynrei ki neh ki sah pateng pakit. Lada ki nongrep trai ri kum i kong Kassar ki ioh ka jingkyrshan kaba thikna yn sa lah ban ioh ia ka imlang sahlang, ka Ri ka Jylla kaba riewspah, kaba dap kyrhai, kaba ia im mar ryngkat, kaba bha bad kaba khiah krat.

### Shaphang ki nongthoh:

Deaidakami Mohrmen i trei kum i Field Coordinator ha ka Society for Urban and Rural & Rural Empowerment (SURE) bad lah ban thoh sha i ha kane ka email-damimohrmen@gmail.com

Coriniki Slong i trei kum i Field Coordinator ha Society for Urban and Rural & Rural Empowerment (SURE) bad lah ban thoh sha i ha kane ka emailcorinikis-long31@gmail.com

Bhogtoram Mawroh i trei kum Senior Associate ha NESFAS bad lah ban thoh sha i ha kane ka email bhogtoram.nesfas@gmail.com

## KI JINGJIA HA KA HISTORY JONG KA JYLLA U General Secretary un leit ia kynduh ia ki M.P.

Te khnang ban nang pynphriang bad nang pynsngewthuh ia ki M.P bad ia ki nongialam ki bym dei ki Riewlum, la rai ba u Mr. Stanley Nichols Roy, Gen Sec ryngkat bad ki CEM ki nongthoh kot khubor bad kiwei kiwei de ki Rangbah ba kloï ban leit, kin ia leit sha Delhi ban iakynduh ia ki M.P. kane ka long kawei ka buit thymmai ba ka APHLC ka pynndonkam ha ka jingialeh Hill State. U Prof. Swell u la kular ban iarap katba lah ha kane ka bynta.

[U NONGSAIÑ HIMA (12 tarik Lber, 1963)]